



Sesida dals

15 d'avrigl 2025

Communitgà ils

17 d'avrigl 2025

Protocol nr.

290/2025

Dumonda Hohl

concernent l'unificaziun da las taxas d'utilisaziun d'implants da sport
cun las vischnancas da staziunament

Resposta da la Regenza

Las vischnancas èn las acturas statalas las pli impurtantas en il sector da la promoziun dal sport e dal moviment. Ellas han ina influenza directa sin las cundiziuns generalas per il sport ed il moviment e portan la chargia finanziaria principala. Tar las incumbensas las pli impurtantas tutgan la construcziun ed il manaschi d'implants da sport, la regulaziun da l'access a quests implants sco er la purschida da spazi per sport e moviment. Il chantun po furnir – cun atgnas infrastructuras – ina contribuziun a la promoziun dal moviment e dal sport. Tenor l'art. 7 da la Lescha davart la promoziun dal sport e dal moviment (Lescha da promoziun dal sport; DG 470.000) duai il sustegn chantunal metter l'accent sin la promoziun dal sport d'uffants e da giuvenils. Il portfolio dal chantun Grischun cuntegna ils suandants trais implants da sport:

- implant da sport Sand da la Scola chantunala grischuna (territori communal da la citad da Cuira)
- implant da sport sin l'areal Scalära, prendì en locaziun tras la Scola auta da pedagogia dal Grischun sco institut autonom da dretg public (territori communal da la citad da Cuira)
- implant da sport Plantahof (territori communal da Landquart)

Tut quests implants da sport servan en emprima lingia al manaschi da scola e vegnan gestionads da las instituziuns da furmaziun respectivas. Tenor pussaivladad vegnan els mess a disposiziun a terzas persunas. Sco che l'exempel da la Scola chantunala grischuna mussa, cuvran las entradas dals tschains da locaziun mo per part ils custs che resultan en quest connex. Uschia surpiglia il chantun gia oz ina part dals custs per l'utilisaziun dals implants tras terzas persunas.

Tar la dumonda 1: La Regenza è pronta d'examinar in'unificaziun da las tariffas da locaziun. L'emprim spetga la Regenza dentant ina decisiun definitiva da la citad da Cuira, per guardar sche las taxas d'utilisaziun en il sector dal sport d'uffants e da giuvenils vegnan decretadas conform a l'incumbensa dal cussegl communal. Perquai

ch'ina sanaziun totala dals implants da sport Sand è necessaria ils proxims 3 fin 5 onns, ston las tariffas da locaziun vegnir examinadas ed adattadas a las basas dals custs respectivas. Tut tenor l'urari dal project da sanaziun vegni ad esser raschunaivel d'adattar l'urden da taxas mo ina giada.

Tar la dumonda 2: Il chantun posseda sulettamain anc ina halla da gimnastica, quai al Plantahof sin il territori communal da Landquart. Pervia da la renovaziun da la chasa da scola n'è la halla da gimnastica betg stada en funcziun ils onns 2019 fin 2021. Suententer è ella vegnida duvrada sco sala da mangiar. Suententer ina sanaziun dal palantschieu, po ella puspè vegnir dada en locaziun il pli baud a partir dal settember 2025. Pervia dal manaschi stagional cun quatter uraris che dependan da las stagions e cun differentas occurrenz, è in'occupaziun tras uniuns pussaivla mo limitadamain durant l'entir onn. Sut questas premissas spezialas pon las tariffas vegnir cumparegliadas mo cun resalva.

Tar la dumonda 3: Perquai che la citad da Cuira ed ils implants da sport Sand han divers systems da metter a quint las tariffas, unitads inegualas e differentes dumber da tariffas, po in eventual plus resp. minus d'entradas – en il meglier cas – mo vegnir stimà, sch'i vegn midà al sistem tariffar da la citad da Cuira. Resguardond la repartiziun approximativa da l'occupaziun sin las differentas categorias pon ins, cun las tariffas actualas, partir dal fatg, ch'ina assimilaziun chaschunass in retgav negativ da 10 000 fin 20 000 francs. Ultra da quai resultassan custs supplementars per adattar la software da locaziun e – tut tenor l'occupaziun – per las pedellas ed ils pedels sco er per il nettegiament. Sch'ils implants da sport Sand vegnissan mess a disposiziun gratuitamain a las uniuns, resultass in minus d'entradas da locaziun da var 108 000 francs per onn. Ils custs per las pedellas ed ils pedels, per il nettegiament e per il material stuessan en quest cas vegnir surpigliads cumpletamain dal chantun. Perquai che l'impuls d'utilisar ils implants en moda effizienta croda davent, stoi vegnir fatg quint cun in augment da la quantitat. In punct intschert è er, sche tschertas uniuns da sport da la regiun transferissan lur sedia a Cuira per pudair profitar da l'utilisaziun gratuita.



En num da la Regenza

Il president:

Il chancelier:

Marcus Caduff

e.sub. C. Hartmann Lütcher